

欽定大清會典事例

卷九十二至九十五

吏部

處分例

欽定大清會典事例卷九十二

吏部

處分例

京官給假

道府告假

教職告假

外官告病

候補候選人員告假

京官告病

京官給假○順治初年定在京大小官員告假祭祖父者食俸十年以上省親者食俸六年以上遷葬者食俸五年以上親老送回原籍者不論食俸○康熙十年題准各官給假取本衙門堂官咨文並同鄉京官印結到部由部具題得旨方准給假至俸深於應升月分不准告假其定限

直隸各省均一例許住家四月。往返路程。直隸限四月。山東。山西。河南限六月。江南。江西。浙江。湖廣。陝西限八月。福建。四川。廣東。廣西。貴州限十月。雲南限一年。其衙門咨請暫假不開缺者不准。至假滿時。人文到部。令其候補。○乾隆五年奏准。在京官員。有聞其父母患病。急欲省視。或父母年逾七十而衰憊者。均不俟六年俸滿。亦不得定以限期。即取具同鄉京官印結。具呈本衙門。該堂官具奏請

旨。給假回籍。該堂官具奏之後。知照吏部開缺。不必

彙題。如有止請暫假數月。假滿回任。並不聲明。例應開缺。含糊陳奏者。俟知照到部後。除仍行開缺外。並將具奏之該堂官。交部議處。其食俸六年告假省親。仍照舊例行。○三十七年議准。文職旗員。緣事告假。京堂以上。自行具奏。其餘令該堂官酌量給予假期。除去程途往返。限期總不得過四月。移咨吏部。於月底彙題。其候補文職各官。令該旗都統照現任之例。給予假期。仍咨吏部彙題。如有不按限回任。回旗者。照赴任違限例議處。其有患病及中途阻滯情由。即

報明地方官詳查報部。照例展限。○五十七年

諭鑾儀衛奏整儀尉喀隆阿告假赴伊父任所等語。殊

屬錯誤。旗員有父母在外任。告假前往者。或因伊父

母病重。前往省視。或因病故後。接取骨殖回京。於事

尚為有因。今喀隆阿之父。並無事故。率行告假。若可

准行。則旗員有父母在外任者。必至盡行告假。前往

省視。殊非政體。該大臣等何得轉為具奏。嗣後似此

無故告假者。俱不准行。○嘉慶五年奏准。京官因歸

祭省親。遷葬。送親。婚娶等事。告假者。除去往返

日期。在家止許住四月。如假滿之後。不赴京候

補照病痊赴補遲延之例議處。○十五年

諭。本日吏部彙題官員丁憂告病一本。已依議行矣。朕閱本內告病項下。庶吉士孔傳綸等呈請回籍調理。至二十二名之多。其中恐不免有假託情事。該員等幸列詞館。如果患病屬實。驟難痊愈。請假調理。自應原情允准。儻因散館之期尚遠。託故閒游。是進身之初。已失勤慎職業之道。著教習庶吉士將該員等患何病狀。因何同時具呈之處。分析查明。據實具奏。○

又

諭。昨朕閱吏部彙題官員告假事故本內。庶吉士患病

呈請回籍調理者共二十二名。降旨交教習庶吉士查明具奏。茲據秀甯等覆奏。京官告假省親等項。定例須食俸六年。始准具呈。惟患病准其隨時呈明。給假。各該庶吉士有實因患病回籍者。亦有因甫得一官。家有老親。不能迎養。又未符省親例限。偶有微疾。即以患病呈請。取結咨部辦理等語。新科庶吉士由舉子會試來京。中式後蒙恩錄用。如家有父母。即年未衰老。急思歸省。原屬人子至情。或留京資斧不給。回籍設措。亦屬事所恆有。儘可據實呈明。何必紛紛託詞患病。而教習及吏部亦明知事由假託。委驗咨

題。虛應故事。殊非覈實辦公之道。著交吏部改擬條
例。嗣後庶吉士告假。除實係患病者。循例辦理外。其
請假省親。不必拘食俸六年之例。准其據實呈明。給
假。但亦須定以限制。如除去來往程期。應給假幾箇
月。準情酌議。其資斧不給者。該部本有回籍措費舊
例。著一併酌議奏明。載入則例。○又

諭

庶吉士一項人員。向不計俸。又無報滿日期。其告假
之久暫。亦漫無定限。殊非勵品覈實之道。嗣後庶吉
士等呈請給假。除實係患病終養外。其請假省親。修
墓等事。不必論歷俸年分。俱令據實呈明。仍各按省

分遠近。除去往返程途。定限在家居住四箇月。期滿即應起咨銷假。如違限不到。查係無故逗遛者。著奏明將該員懲治不貸。欽此。遵

旨議定。庶吉士有因省親。接眷。修墓。葬親。並實因資斧不給。請假回籍措費等事。不必拘以歷俸年限。准其取具同鄉京官印結。據實聲明。具呈本衙門。咨明吏部。附入彙題。其程限假限。以准假之日扣算。悉按其省分遠近。除去往返程途。在家許住四箇月。期滿後。即日請咨赴館銷假。如違限不到。查係無故逗遛者。照例查明奏請議處。

其各衙門額外人員。有告病省親。接眷修墓葬親等項。並資斧不繼。呈請回籍者。亦毋庸拘以年限。令其取具同鄉京官印結。具呈本衙門。咨明吏部給假。俟報滿補缺時。俱將告假日期扣除。其分部人員內。如有例應在部投供候選者。仍查照該員是否頂選。分別辦理。

道府告假。○乾隆十六年

諭道府等官。於請訓赴任時。有面奏暫假回籍經允准者。皆於次日具呈吏部覆奏。此雖向例。而人容有不知者。文員告假。有何關係。此不過陞見之時。以為奏

對塞責耳。嗣後各省道府等官。皆不得於請訓時自行乞假。皆令赴部呈明。其應否准行。即由該部酌定。給以假期。仍按月彙奏。以昭畫一。欽此。遵

旨議定。道府等官。告假回籍者。有省親及祭埽祖墓之分。應除去往返程途計算。如呈請省親祭埽者。准其告假二十日。修墓及遷葬者。准其告假一月。總不得逾一月之限。

教職告假。○乾隆五年議准。各省教職。食俸三年以上。如有父母在家。不能迎養。欲回籍省親及葬親省墓等事。准其咨明州縣官。轉詳該管

上司查明委係實情。取具該州縣印結。計其程途遠近。酌給假期。報明存案。員缺毋庸開選。不得一學兩官同時告假。亦不得告假之後復行請假。如一學止設一官者。亦准一例給假。令該州縣暫攝學篆。其准假之員。該上司勒限回任。儻逾限不到。該督撫照例咨叅。○十二年議准。嗣後教職告假期內。聽其食俸。其假期屆滿。果係一時抱病。令原籍地方官驗明結報。許其展限一月。病痊回任。如一月限滿。該員病體難以驟痊。令原籍地方官照告病例。驗明出結通詳。

咨部別選。如有捏飾徇延等弊。將該員並地方官。照例分別叅處。再定例。內外官員。皆按到任日期。較俸升轉。如有離任事故。按日扣除。嗣後遇有教官告假。該督撫酌定假期。務將起程回任日期。分析報部註冊。升轉時。亦照離任事故之例。按日扣除。又定例。調任官員。如有未報到任者。雖值論俸應升之時。不准升轉。今教官既定有告假扣除日期之例。嗣後如遇論俸應升之時。該員正在告假限內。亦應停其升轉。俟假滿回任。咨報到部之日。再行升用。

候補候選人員告假。○康熙十年議准。內外大小候補官員。如有情願回籍者。具呈准其回籍。俟來京之日。仍照原文補授。大選官員。亦准給假。選授之時。仍照原序。○又議准。凡考取內閣中書。有具呈給假回籍者。亦准給假。來時仍照考取註冊名次挨補。○乾隆三十二年

諭

朕因舉人銓選壅滯。是以加恩揀發各省。俾得及鋒

而試。其未經得缺以前。原與現任官員有閒。伊等如有情願告假回籍者。聽其自便。並毋庸定以一年之期。

京官告病。康熙九年議准。在京漢官告病給假者。回籍調理。停其勒限年分。俟病痊之日。該督撫咨部註冊。赴部補用。如大學士。尚書。左都御史。侍郎。內閣學士。左副都御史。告病告假。自行具奏。其餘各官。具呈該部院衙門。取具同鄉京官並無假捏印結。該部院移咨吏部彙題。准其回籍調理。如身無疾病具呈者。將本官降一級調用。驗看出結官。各罰俸一年。堂官罰俸六月。其告病回籍官。在地方生事營私。發覺。將本官革職。所屬地方官不報督撫者。降二級調用。

該地方官既報督撫。督撫不行具題者。將督撫降一級留任。其丁憂告假回籍官員。在地方生事。發覺後。亦照此例。○二十六年題准。在京各部院衙門滿漢官員。告病之後。若病痊。俟一年限滿。方准起病補用。如有不及年限咨部者。概不准行。○雍正十二年定。凡告病告假。丁憂等事。皆半月彙題一次。值初一十五日不進本。○乾隆四年奏准。文職旗員。無論現任及指缺推升擬補。或未經引。

見與已經引

見尚未到任之員。如實係患病。均令該管官委官確實查明。並無捏飾。酌量給以假期。咨部存案。准其在家調理。總不得過六月之限。如逾限不痊。開缺別補。俟病痊之日。仍以原衙門補用。其額外食俸官員。如遇患病。亦照此例定限。如逾限不痊。即行停俸。俟病痊之日。仍在原衙門行走。如無疾捏稱有疾呈報者。別經發覺。照漢官之例。將本官降一級調用。驗看官罰俸一年。出咨之該管官。罰俸六月。○三十七年奏准。

盛京五部官員。除偶爾患病。為日無多者。酌量給